

AUZITEGIAK. Kazetariaren sorterrian, Beran, elkartasun eguna egingen da bihar

Alderdi abertzale guztiek elkartasuna adierazi diote Jon Abril kazetariari

Asteartean Auzitegi Nazionalean egingen zaion epaiketa argudio juridikorik gabea dela diote



JAGOBA MANTEROLA / ARGAZKI PRESS

Pernando Barrena (Batasuna), Koldo Amezketza (EA), Patxi Zabaleta (Aralar), Jon Abril, Jesus Rodriguez (Batzarre) eta Laura Igantzi (EAJ), atzo.

AGIRIA

Funtsik gabeko auzia

AB, Aralar, Batasuna, Batzarre, EA, EAJ, Zutik alderdiek agiri hau izenpetu dute Jon Abril kazetariaren kasuari buruz:

1. Ttipi-ttapa Telebistaren jarduna, Euskal Herriko herri-komunikabideetan bide urratzaile izan dena, zilegia dela eta, horren haritik ere zilegia dela bertako lantaldeak eguneroko programaziorako egiten duen lana, egun hartan Jon Abrirek egiten zuena bezala.
2. Inolako argudio eta funts juridikorik gabeko auzia dela Jon Abrirena, eta hortaz, bertze behin salatu nahi dugu auziari eman zaion izaera eta tratamendua. Euskara eta euskal kultura zigortzeko saiakeraren barrenean kokatzen dugu auzi hau. Ezaguna baita aski Jon Abriren jarduna euskarazko hainbat hedabidetan (Euskaldunon Egunkaria, Euskadi Irratia, Argia, Xorroxin Irratia, Aizu, Nabarra eta Ttipi-ttapa, bertzeak bertze), kulturgintzan zein euskalgintzan euskararen normalizazioa babesten egindako lana (Berako Kultur Batzordea, Bortzirietako Euskara Mankomunitatea, Bertsozale Elkartea, IKA, Kontseilua, EKB... kasu).
3. Jon Abrirek egun hartan Entzutegi Nazionalako atarian bertze hedabide anitzek egiten zuten gauza bera egin zuen, alegia, informazio bat biltzeko irudiak hartzea. Hala bada, han gertatutakoak ikusita ondorioztatzen da komunikabide guztiei ez zaiela tratatu bera ematen, eta gainera, informazioaren eskubidearen eta adierazpen askatasunaren aurkako eraso garbia da hau. Aniztasunaren izenean, hedabide ttiki zein handiek, eta kazetariak, oro har, euren langintza behar bezala jorra dezaten informatzeko eskubidea izan dezatela aldarrikatzen dugu hemendik, eta bide batez, herritar orok informatua izateko duen eskubidea berma dadila.
4. Gure elkartasuna adierazi nahi diogu Jon Abrili, bere sendiari, Ttipi-ttapa Fundazioari eta, bide batez, Berako herri guztiei.

Irene Arrizurieta | IRUÑEA

AB, Aralar, Batasuna, Batzarre, EA, EAJ eta Zutik taldeek elkartasuna eta sostengua adierazi zioten atzo Jon Abril Ttipi-ttapa kazetari eta EGUNKARIAKO kolaboratzaileari, Iruñean komunikabideen aurrean plazaturiko idatziaren bidez. Asteartean kazetariari Auzitegi Nazionalean egingen zaion epaiketa «argudio juridikorik gabea» dela azpimarratu zuten.

Agerraldian alderdiok sinatutako lau puntuko idatzia irakurri zuten. Bertan izan ziren, Jon Abril kazetaria guztien erdian zutela, Fernando Barrena (Batasuna), Koldo Amezketza (EA), Patxi Zabaleta (Aralar), Jesus Rodriguez (Batzarre) eta Laura Igantzi (EAJ). ABko eta Zutik-eko ordezkariak ezin izan ziren etorri, baina atxikimendua adierazi zuten.

Denen izenean Patxi Zabaletak irakurri zuen idatzia euskaraz. Abrirena «inolako argudio juridikorik gabeko auzia» dela salatu zuten. «Salatu nahi dugu auziari eman zaion izaera eta tratamendua. Euskara eta euskal kultura zigortzeko saiakeraren barrenean kokatzen dugu auzi hau», zioten, eta gogoratu zuten Jon Abriren jarduna euskarazko hainbat hedabidetan, kulturgintzan zein euskalgintzan egindako lana.

Jon Abril beratarra heldu den asteartean epaituko dute Auzitegi Nazionalean. 2000ko abuztuaren 17an Tipi-ttapa telebistarako irudiak hartzen ari zen Abril, Berako gazte batek deklaratzeko zuelako Auzitegiaren. Irudietan Poliziaren ibilgailu baten matrikula hartu omen zuela eta, talde armatuarekin kolaborazioa leporatu zioten. Sei urteko kartzela zigorra, sei urteko inhabilitazioa eta 7.200 eurotako isunaren eskariari aurre egin beharko dio.

Taldeok adierazi zuten Jon Abrirek Ttipi-Ttapa Telebistarentzat egun hartan irudiak hartzean «bertze hedabide anitzek egiten zutena, informazio bat biltzeko irudiak hartzea, alegia» izan zela. Han gertatutakoak ikusita, alderdiok «komunikabide guztiei ez zaiela tratatu bera ematen» salatu zuten. Are gehiago, Abrili jazotako «informazioaren eskubidearen eta adierazpen askatasunaren aurkako eraso garbia» dela azpimarratu zuten.

Bihar Jon Abrirek elkartasun eguna antolatu dute Beran. Herriko Kultur Batzordeak *Errugabeak gara, inuxenteak ez* lelopean hainbat ekitaldi antolatu ditu. Goizean musika emanaldiak izanen dira, eta arratsaldean, Altxateko plazan, antzerkia, bertsolariak, kantariak eta talo jatea.

ERREFUXIATUAK

Goirizelaia Espainiari «men egitea» egotzi dio Venezuelari

Erredakzioa | DONOSTIA

Jone Goirizelaia Batasuneko legebiltzarkideak «Espainiako koroari men egitea» egotzi zion atzo Venezuelako Atzerri ministro Roy Chadertoni. Chadertonek egindako adierazpenei erantzun zien modu horretara Goirizelaia. Venezuelak «Espainiarekin duen terrorismoaren aurkako lankidetzaren eredu aldatu» egin dela esan zuen Chadertonek. Venezuelak galarazi egin zien sarrera Jose Luis Elkoro eta Mikel Arbeola euskal herritarrei. Debeku horren eta Bittor Galarza errefuxiatuaren kanporatzearen haritik egin zituen adierazpenok Chadertonek.

«Espainiaren exijentziak Konstituzioaren eta nazioarteko legeriaren gainetik al daude?», galdetu zuen Goirizelaia. Batasuneko ordezkariak iheslariaren izaera politikoa gogorarazi zuen. Bere ustez, «terrorismoaren aurkako borrokaren aitzakian ez du denak balio».

ARALAR

Zabaletaren aurka Donostian azaldutako «irainak» salatu ditu Aralarrek

Erredakzioa | DONOSTIA

Joan zen asteburuan Donostian eskegitako pankarta batean Patxi Zabaletaren kontra azaltzen ziren «irain larriak eta salaketa faltsuak» salatu zituen atzo Aralarrek. Segik izenpetutako pankartan, Zabaletari «herriaren saltzaile» izatea leporatu zioten.

Aralarrek «probokazio-tzat» jo du. Bere ustez, jokabide horiek «geure arteko borroka lazgarria biltzea Euskal Herriaren etsaiei jokoa egitea da». «Baldin eta Segi ez bada ekintza honetatik desmarakatzen, pentsatuko dugu azaldu ditugun iritziak zuzen dagozkiola erakunde horri», adierazi du.